

EDITORIAL

UN GRAN LOGRO

Ayera tabata un dia di jubilo pa tur esnan cu for di un principio a cifra nan speranzanan den e hecho cu Aruba lo logra su Status Aparte, y cu e salida di Antillas lo bay den un ambiente di comprension y buena fe. Hopi biaha ni e comprension ni e buena fe tabata presente, pero danki na tanto perseverancia, tanto esfuerzo y tanto curashi, Aruba a logra cu den Tweede Kamer na Hulanda e decision a cay pa bin cambio di Statuut, y cu e cambianan ey, e Status Aparte di Aruba a keda concretiza y legaliza. Falta awor yena un fecha, y esey lo sosode pa October di e aña aki.

Pabien ta bay prome cu nada otro na Pueblo di Aruba, cu asina a mira e culminacion di un soño di mas di 50 aña, inicia pa e politiconan cu vision y amor patrio, y hiba a cabo pa un conjunto di persona y organizacion cu merece tur clase di elocio. Claro cu meritanan grandi ta keda pa MEP y su lider, Betico Croes, kende den ningun momento a flaquea frente e reto cu e tabata tin su dilanti. Pero su so e no lo por a logra tampoco. El a conta cu e apoyo y sosten di hendenan y agrupacionnan cu di berdad a pone pecho tras di e iniciativa di duna pueblo di Aruba e Status especial dentro di Reino cu e tabata anhelando.

DIARIO den esey ta e unico corant cu semper a para tras di e lucha pa Status Aparte. Apesar di tur e intentonan di torpedea e lucha pa Status Aparte, especialmente presente den e corantnan di Curacao, cu no a laga momento pasa pa yena nan paginan cu articulan y opinionnan contra Status Aparte, e esfuerzonan conjunto di tanto hende, partido y instancia a triunfa ariba e mala fe y deseo di obstaculiza e gran logro aki. Awe ya e ta un realidad y e momento a yega pa tur hende cera cabez, pone capricho un banda y cuminsa traha ariba e reto di converti Status Aparte den algo positivo, productivo y beneficioso pa pueblo di Aruba.

E reto ey ta grandi, ya cu Status Aparte a yega na un momento cu e economia di nos isla ta pasando den su peor momento di e ultimo 60 añanan. Un gran pilar a cay afo y nos a keda para ariba e otro cu cada dia ta promete di bira mas fuerte y mas duradero. Pa mantene asina tur hende na Aruba mester duna un man, pa bende nos isla como destino turistico, y berdaderamente brinda esnan cu ta bishita nos isla (trenciendo prosperidad) e mejor trato posible.

Cu e obtencion di e voto na favor di cambio di Statuut den Tweede Kamer nos a logra Status Aparte, pero ta awor e tarea duro ta bin, ya cu e Status Aparte ey mester bira e signo di progreso di Aruba. Den esey mester probecha di tur e aportenan positivo cu a bin ariba mesa den e ultimo temponan, entre otro e plan di rescate di AVP, partido cu no solamente a brinda un apoyo firme na e realizacion di Status Aparte, pero tambe a pone di su parti pa trece sugerencianan y ponencianan positivo pa yuda sali for di e tranca economico cu circunstancianan a forza ariba nos.

DIARIO awe ta sinti su mes satisfecho di su papel den e lucha aki. Nos a para firme tras di Status Aparte y den ningun momento, pa dificil cu e por tabata, nos a varia nos posicion ni nos postura. Nos a simplemente defende loque nos ta kere aden y cu mayoria absoluto di pueblo Arubano ta kere aden.

Un reconocimiento masha especial ta bay pa Betico, kende tabata e motor tras di e logro aki, y kende no a escatima ningun esfuerzo pa duna pueblo e realizacion di un soño di mas di 50 aña como un "fait accompli". Laga tur hende di buena fe duna Cesar loque ta di Cesar. E merece!

PDA TA BAY CAMPAÑA CU 13 COMISION

ORANJESTAD(AAN) — Den sede di PDA ayera tardi tabata tin un conferencia di prensa, caminda vocero di partido, Frank Booi, a duna di conoce cu e campaña di partido a cuminsa desde cu nan a habri nan sede dia 27 di Maart ultimo.

E campaña ta den fase mientras cu diferente comision a keda instala manera di damas, di juventud, mientras cu e corant vanguardia ta sali ariba mercado cu diez mil ejemplar.

Un aparato administrativo y organisatorio ta acompaña e campaña di PDA cu por conta cu un total di 13 comision cu cada uno un tarea den e organizacion di partido.

Ta envolve mas hende

cu ta posible den e proceso cu ta existi basta trabao y finalmente consejeronan lo traha e programa di partido.

Ayera e segundo fase di campaña a cuminsa pa PDA cu a bisa cu tradicionalmente partidonan ta apunta un lider di campaña, cu sin embargo no por haci tur trabao comoquiera cu e no ta superman.

Ta pesey PDA a forma un team di campaña cu ta bay traha den cooperacion estrecho cu e partido y lo bay organisa por ejemplo reunion di contacto.

Frank Booi a muestra ariba e fecha historico, esta 9 di Juni, comoquiera cu na aña 1944, aliadonan a cuminsa nan ofensiva

contra Hitler.

PDA a escoge e fecha aki como simbolico comoquiera cu e partido lo kier kibra dictadura na Aruba, ademas cu ayera tabata tin jubilo pa e sucesonan na Hulanda.

Booi a bisa cu e Gobierno actual a hiba Aruba na un rumbo cu ta significa actonan den forma di dictadura. E partido lo bay usa cierto lemanan y lo bay muestra den esaki ariba cierto situacionnan, esta cu lastimamente mester drenta Status Aparte cu un caha bashi.

Lo mestr mobiliza pueblo pa mejpra e situacion social economico mientras cu lo bay traha pa motiva esnan cu pasobra nan ta fada lo no kier vota, di bay urna electoral.

AGENTENAN POLICIAL MESTER DICIDI

ORANJESTAD(AAN) — Segun fuentenan generalmente bon na altura, Gobierno di Aruba lo ta preparando un carta extenso pa personal di polis cu lo mester escoge cu e ta keda Aruba o kier bay

otro isla.

Tin varios agente policial cu poa motibonan familiar, personal o tambe manera DIARIO a wordo informa pa falta di informacion encunto futuro

di Cuerpo kier traslado pa otro isla.

Despues di varios reunion entre Gobierno y e agentenan awor lo sali un carta pa pone nan na altura cu nan mester escoge.

Segun Henny Eman:

VOZNAN LO REZONA NA HULANDA

ORANJESTAD(AAN) — Segun Henny Eman, ni MEP, ni Eeste Kamer ni Tweede Kamer ni Hulanda lo por dicidi encunto e fecha di independencia pa Aruba. Ta Pueblo mester tin e derecho di dicidi.

Politiconan por a bay di acuerdo cu un fase transitorio, segun Eman, pero nunca mester a mara nan mes. Den pasado, estudionan di Comision di Reino, na varios ocasion a muestra cu pueblo mester tin e derecho pa dicidi encunto independencia.

Mescos cu den pasado Pueblo a expresa su mes pa Status Aparte y e politiconan a hiba e deseo aki dilanti, awor pa independencia tambe no por obliga Aruba di mara su mes na un fecha.

Pesey Mito Croes a entrega e cambio den e concepto di ley, segun Eman, cu a enfatiza cu

pueblo mester haya e oportunidad pa expresa su mes.

Henny Eman a bisa cu

MEP a laga e posicion di e bloke Arubano cay, pasobra Hulanda ta usa MEP como un instrumento.

